

kawasan tanah perkuburan. Beliau telah meninggalkan beberapa orang anak yang turut berjasa kepada agama seperti mantan Mufti Kerajaan Negeri Sembilan, Dato' Hj. Mohd Murtadza bin Haji Ahmad.

Sebuah institusi pendidikan agama terkenal di Negeri Sembilan suatu masa dahulu iaitu Sekolah Agama Menengah Atas dan Senawi Gemencheh telah ditukar namanya kepada Maahad Ahmadi Negeri Sembilan (MANS) pada tahun 1990 bersempena nama Tuan Syeikh Hj. Ahmad bin Syeikh Haji Muhammad Said. Beberapa orang pensyarah Akademi Pengajian Islam Kontemporari Cawangan Negeri Sembilan sendiri adalah keluaran Maahad Ahmadi antara penulis sendiri (Dr. Mohd. Kamel bin Mat Salleh & Dr. Muhammad Firdaus bin Abdul Manaf), Dr. Adibah binti Bahori, al-Marhum Ustaz Mu'allim bin Mohd. Bakri, Ustazah Nuruul Hidayah binti Mansor dan Ustaz Muhammad Noor bin Hussin.

Atas khidmat cemerlang beliau, Kerajaan Persekutuan telah mengurniakan bintang Ahli Mangku Negara, manakala kerajaan Negeri pernah mengurniakan Pingat Jasa Kebaktian kepada beliau.

Semoga Allah mencururkan rahmatNya kepada al-Marhum Tuan Syeikh Hj. Ahmad bin Syeikh Haji Muhammad Said al-Linggi...al-Fatihah.



Keutamaan Pujian Kepada Allah SWT dan Selawat Kepada Nabi Muhammad

Oleh: **Muhammad Noor Hussin**

Pensyarah Akademi Pengajian Islam Kontemporari. UiTM Cawangan Negeri Sembilan

Memanjatkan puji-pujian kepada Allah SWT disunatkan apabila hendak memulakan suatu perkara penting dan juga apabila telah selesai melakukannya seperti sesudah makan, minum, bersin, ketika melamar seorang wanita dan sewaktu akad nikah. Bahkan disunatkan juga untuk menutup sesuatu doa dengan pujian kepada Allah SWT seperti firman Allah SWT

وَأَخِرَ دَعْوَاهُمْ أَنِ الْحَمْدُ لِلَّهِ رَبِّ الْعَالَمِينَ

Maksudnya: "Dan penutup doa mereka ialah segala puji bagi Allah Tuhan yang mentadbir sekalian alam" (Surah Yunus: 10). Selain daripada itu, pujian kepada Allah SWT merupakan perkara yang wajib dilakukan pada sesetengah keadaan seperti ketika membaca khutbah. Malah, mengucapkan "Alhamdulillah" merupakan rukun dalam khutbah Jumaat dan khutbah-khutbah yang lain. Tanpa ucapan tersebut, khutbah dikira sebagai tidak sah

Imam Syafie rahimahullah ada mengatakan "Aku suka seseorang yang memulakan percakapan dan segala perkara yang dilakukannya dengan memanjatkan puji-pujian kepada Allah SWT dan selawat serta salam kepada Nabi SAW". Begitulah kalam imam besar kita akan keutamaan pujian kepada Allah SWT serta salam kepada Nabi SAW dalam apa jua urusan yang dilakukan." Hal ini turut diberi penekanan dalam sabda baginda Nabi SAW yang diriwayatkan daripada Abu Hurairah R.A.

كُلُّ أَمْرٍ ذِي بَالٍ لَا يُبْدَأُ فِيهِ بِالْحَمْدِ لِلَّهِ فَهُوَ أَقْطَعُ

Maksudnya: "Segala perkara yang memiliki kepentingan dan tidak dimulakan dengan pujian kepada Allah SWT, maka perkara itu terputus daripada rahmat". (Riwayat Ibnu Majah: 1894)

Menurut Imam al-Nawawi rahimahullah, lafaz terputus daripada rahmat (aqta') membawa maksud kurangnya keberkatan. Pada masa yang sama, Umar bin al-Khattab R.A. turut meriwayatkan:

إِنَّ الدُّعَاءَ مَوْفُوفٌ بَيْنَ السَّمَاءِ وَالْأَرْضِ، لَا يَضَعِدُ مِنْهُ شَيْءٌ حَتَّى تُصَلِّيَ عَلَى نَبِيِّكَ صَلَّى اللَّهُ عَلَيْهِ وَسَلَّمَ

Maksudnya: "Sesungguhnya doa terhenti di antara langit dan bumi, tidak akan naik sedikit pun sampai engkau membaca selawat kepada Nabimu" (Riwayat al-Tirmizi: 3477)

Begitulah pentingnya tahmid dan selawat malah ulama bersepakat sunat memulakan doa dengan memanjatkan puja dan puji kepada Allah SWT kemudian membaca selawat kepada Nabi SAW.

Kesimpulan yang dapat dibuat, disunatkan mengucapkan pujian kepada Allah SWT dan selawat ke atas Nabi SAW dalam apa jua urusan yang dilakukan. Sebarang urusan yang tidak dimulakan terlebih dahulu dengan pujian kepada Allah SWT akan mengurangkan keberkesannya (keberkatan). Doa yang tidak disertakan dengan selawat ke atas Nabi Muhammad SAW akan terhibab serta tergantung di antara langit dan bumi.

Rujukan: al-Azkar al-Nawawi